

**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ
ԳՅՈՒՂԱՏՆՏԵՍԱԿԱՆ ԿԵՆԴՐԱՆԻՆԵՐԻ ՇՈՒԿԱՆԵՐԻՆ
ՆԵՐԿԱՅԱՑՎՈՂ ՊԱՀԱՆՋՆԵՐԸ ԵՎ
ԱՆԱՍՆԱԲՈՒԺԱՍԱՆԻՏԱՐԱԿԱՆ ՎԵՐԱՀՍԿՈՂՈՒԹՅԱՆ
ԿԱՐԳԸ ՍԱՀՄԱՆԵԼՈՒ ՄԱՍԻՆ**

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

_____ 2023 թվականի N _____-Ն

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ԳՅՈՒՂԱՏՆՏԵՍԱԿԱՆ

**ԿԵՆԴՐԱՆԻՆԵՐԻ ՇՈՒԿԱՆԵՐԻՆ ՆԵՐԿԱՅԱՑՎՈՂ ՊԱՀԱՆՋՆԵՐԸ ԵՎ
ԱՆԱՍՆԱԲՈՒԺԱՍԱՆԻՏԱՐԱԿԱՆ ՎԵՐԱՀՍԿՈՂՈՒԹՅԱՆ ԿԱՐԳԸ**

ՍԱՀՄԱՆԵԼՈՒ ՄԱՍԻՆ

Հիմք ընդունելով «Կառավարության կառուցվածքի և գործունեության մասին» օրենքի հավելվածի 15-րդ կետը և «Անասնաբուժության մասին» օրենքի 6-րդ հոդվածի 3-րդ մասը՝ Հայաստանի Հանրապետության կառավարությունը **որոշում է.**

1. Սահմանել Հայաստանի Հանրապետությունում գյուղատնտեսական կենդանիների շուկաներին ներկայացվող պահանջները և անասնաբուժասանիտարական վերահսկողության կարգը՝ համաձայն հավելվածի:
2. Սույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

ՎԱՐՉԱՊԵՏ

Ն. ՓԱՇԻՆՅԱՆ

Հավելված

ՀՀ կառավարության 2023 թվականի

_____ -ի N ____ -ն որոշման

ԿԱՐԳ

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ԳՅՈՒՂԱՏՆՏԵՍԱԿԱՆ ԿԵՆՊԱՆԻՆԵՐԻ ՇՈՒԿԱՆԵՐԻՆ ՆԵՐԿԱՅԱՑՎՈՂ ՊԱՀԱՆՁՆԵՐԸ ԵՎ

ԱՆԱՍՆԱԲՈՒԺԱՍԱՆԻՏԱՐԱԿԱՆ ՎԵՐԱՀՍԿՈՂՈՒԹՅԱՆ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կարգավորվում են գյուղատնտեսական կենդանիների շուկաներին ներկայացվող պահանջների և դրանց անասնաբուժասանիտարական վերահսկողության հետ կապված հարաբերությունները:
2. Գյուղատնտեսական կենդանիների շուկան՝ առևտրի իրականացման վայր է, որտեղ իրականացվում է գյուղատնտեսական կենդանիների առուվաճառք:
3. Գյուղատնտեսական կենդանիների առուվաճառք կարող է իրականացվել նաև առցանց:
4. Կենդանիների վաճառքն առցանց կազմակերպելու նպատակով էլեկտրոնային տարբերակով պետք է հայտարարությանը կցված լինի Հայաստանի Հանրապետության կառավարության 2010 թվականի հոկտեմբերի 21-ի N 1499-Ն որոշմամբ հաստատված N 2 հավելվածի N 1 ձևի անասնաբուժական ուղեկցող փաստաթուղթը՝ վկայականը:
5. Գյուղատնտեսական կենդանիների շուկաները **հանդիսանում են անասնահամաճարակային նշանակության կամ անասնաբուժական**

պետական վերահսկման ենթակա օբյեկտներ: Վերջիններիս գործունեությունը կազմակերպող ֆիզիկական կամ իրավաբանական անձինք պարտավոր են ծանուցել անասնաբուժության ոլորտի վերահսկողություն իրականացնող մարմինն (այսուհետ՝ սննդամթերքի անվտանգության տեսչական մարմին)՝ նշելով գործունեության վայրը:

2. ԳՅՈՒՂԱՏՆՏԵՍԱԿԱՆ ԿԵՆՂԱՆԻՆԵՐԻ ՇՈՒԿԱՆԵՐԻՆ ՆԵՐԿԱՅԱՑՎՈՂ

ՊԱՀԱՆՁՆԵՐԸ

6. Գյուղատնտեսական կենդանիների շուկաները պետք է ապահովված լինեն՝

- կենդանիների բեռնման և բեռնաթափման հարթակով,
- առանձին դարպասներով՝ շուկայից կենդանիների մուտքի և ելքի համար,
- ապահովված լինեն լվացող, ցողարկող և ախտահանող սարքերով,
- կոյուղատար առվակներով կամ խողովակաշարերով,
- կառուցված կենցաղային հարմարություններով (էլեկտրա- և ջրամատակարարում),
- փոխադրամիջոցների անիվների ախտահանման համապատասխան հարմարություններով,
- սանիտարական հանգույցով, վճարովի կամ անվճար հասարակական զուգարաններով:

7. Գյուղատնտեսական կենդանիների շուկայի տարածքը պետք է լինի ցանկապատված՝ առնվազն 1,5 մետր բարձրությամբ, այցելուների և տրանսպորտային միջոցների համար նախատեսված առանձին մուտքերով:

8. Կենդանիների համար պետք է նախատեսված լինեն կացատեղեր՝ ճաղագատված տարածքներով, ցանցավոր հատակով:

9. Շուկայի տարածքը պետք լինի հարմարավետ ջրահեռացման, մեխանիկական մաքրման, լվացման և ախտահանման աշխատանքներ իրականացնելու համար:

10. Շուկան պետք է ունենա՝

1) կենդանիների կենսական պահանջներն ապահովող միջոցներ՝ ջրախմոցներ, կերամաններ, ինչպես նաև զոոհիգենիկ պահանջներն ապահովող՝ գոմաղբի հավաքման և հեռացման հարմարանքներ,

2) ծածկ՝ տեղումներից և արևի ճառագայթներից կենդանիներին պաշտպանելու համար,

3) վարչական շինություն և անասնաբույժի սենյակ, պահեստային տարածք՝ սարքավորումներ, ախտահանիչներ, կեր պահելու համար:

11. Առևտրային օրվա ընթացքում չվաճառված կենդանիները գիշերակացը կարող են անցկացնել շուկայում:
12. Շուկայում մատուցված ծառայությունները վճարվում են կենդանիներ վաճառողի կողմից՝ համաձայն շուկայի **գործունեությունը կազմակերպող սուբյեկտի կողմից սահմանված վճարի:**
13. Շուկայում թույլատրվում է վաճառել կեր, կենդանիների խնամքի համար նախատեսված պարագաներ և ձիաքարշ կցորդներ:
14. Շուկաներում արգելվում է գյուղատնտեսական սննդամթերքի և արդյունաբերական ապրանքների վաճառքը:
15. Շուկայի **գործունեությունը կազմակերպող ֆիզիկական կամ իրավաբանական անձը պարտավոր է ունենալ անասնաբույժ՝ վաճառքի ենթակա գյուղատնտեսական կենդանիներին պարտադիր անասնաբուժական զննում իրականացնելու համար:**
16. Շուկան տարածքը կարող է ապահովված լինել տեսահսկման համակարգով:

3. ԱՆԱՍՆԱԲՈՒԺԱՍԱՆԻՏԱՐԱԿԱՆ ՎԵՐԱՀՍԿՈՂՈՒԹՅՈՒՆԸ

17. Կենդանիներ վաճառողը Հայաստանի Հանրապետության կառավարության 2010 թվականի հոկտեմբերի 21-ի N 1499-Ն որոշմամբ հաստատված N 2 հավելվածի N 1 ձևի անասնաբուժական ուղեկցող փաստաթուղթը՝ վկայականը պարտավոր է ներկայացնել շուկայի անասնաբույժին, վերահսկողության շրջանակներում՝ սննդամթերքի անվտանգության տեսչական մարմնի տեսուչին:
18. Կենդանիների անասնաբուժական զննման համար շուկայի մուտքի մոտ պետք է առանձնացնել հատուկ ցանկապատված տարածք և միայն անասնաբույժի ստուգումից հետո, կենդանին կարող է մուտք գործել շուկա:
19. Վաճառքի ենթակա խոշոր եղջերավոր կենդանիները պետք է ունենան անհատական նույնականացման ականաջապիտակներ: Մյուս գյուղատնտեսական կենդանիները, որոնք չունեն ականաջապիտակներ պետք է ունենան տարբերանշաններ և ենթարկվեն պարտադիր անասնաբուժական զննման:
20. Հիվանդության կասկածանքով կենդանիներ հայտնաբերելու դեպքում կենդանիները մեկուսացվում են և իրականացվում է կլինիկական հետազոտություն անասնաբույժի կողմից, սննդամթերքի անվտանգության տեսչական մարմնի՝ տեսուչի ցուցումով և հանձանարարությամբ:
21. Կլինիկական հետազոտության ընթացքում անասնաբույժը պարտավոր է ծանոթանալ փաստաթղթերին, գնահատել կենդանու ընդհանուր առողջական վիճակը, անհրաժեշտության դեպքում ջերմաչափել, վտանգավոր ախտանշաններ հայտնաբերելու դեպքում՝ արգելել կենդանու մուտքը շուկա և վերջինիս վերադարձնել անասնատիրոջը:
22. Շուկայի տարածքը և անասնահամաճարակային վիճակի, կանոնների ու ցուցումների պահպանումը պետք է լինի մշտական անասնաբուժական վերահսկողության ներքո՝ սննդամթերքի անվտանգության տեսչական մարմնի կողմից:
23. Գյուղատնտեսական կենդանիների շուկայի գործունեությունը

կասեցվում է սննդամթերքի անվտանգության տեսչական մարմնի կողմից՝ Հայաստանի Հանրապետության օրենսդրությամբ սահմանված կարգով, երբ.

- շուկայի տարածքում վաճառվում է կենդանի՝ առանց (կամ ոչ պատշաճ լրացված) ուղեկցող N 1 անասնաբուժական վկայականի,
- սույն կարգի 6-րդ կետով սահմանված գյուղատնտեսական կենդանիների շուկաներին ներկայացվող պահանջները պահպանված չեն,
- շուկայի տարածքում ախտանշաններով կենդանիներ են հայտնաբերվում,
- սույն որոշման 14-րդ կետի դրույթի խախտման դեպքում:

24. Սույն որոշման 23-րդ կետի դրույթներով սահմանված խախտումները երկրորդ անգամ կրկնելու դեպքում՝ կիրառվում է նաև վարչական տուգանք Հայաստանի Հանրապետության օրենքով սահմանված կարգով: